

بسم الله تبارك وتعالى
قصة النبي إبراهيم (سلامه علينا)
سفر التكوين
الفصل الثاني عشر إلى الفصل خمسة وعشرين

بركة أبرام

مولانا يمشي بأبرام شور ارض كنعان

مولانا يسلك أبرام من الجوع ومن المصريين

¹وكمال الله تعالى لأبرام: امشي من ارضك وقبيلتك ودار أهلك، وكيس لارض اللي لاهي انعتلك. ²ولاهي انعدل منك شعب عظيم، ولاهي انباركك، ولاهي انكبر اسمك، واتعود بركة لناس كاملة. ³واللي يباركك يعود امبارك، واللي يلعنك يعود ملعون. ولاهي تتبارك القبائل كاملين اللي فلارض بسببك. ⁴وكام أبرام وعدل ذا اللي كآلو الله تعالى. وامشات امعاه ساراي اعيالو ولوط ول خوه من حاران. وفذا الوقت كان عندو أبرام 75 سنة. ⁵وكبظو امعاهم ادبشهم واعبيدهم اللي كانوا فحاران، وامشاو واعدين ارض كنعان. وإلين وصلو ارض كنعان، ⁶عاد أبرام يمشي من ابليدة شور ابليدة يجول فكنعان يلين اوصل لبليدة اللي فيها صدراية اكبيرة اسمها موري اللي خارج مدينة شكيم اللي ساكنين فيها الكنعانيين فذاك الوقت. ⁷واظهر الله تعالى لأبرام، وكآلو: لاهي نعطي هاذي لارض لنسلك. وكام أبرام وابنا فم مذبح، أوكدّم فيه اذبايح لله تعالى اللي اظهرلو. ⁸وعاكب ذاك امشا من هاذي لبليدة واعد كدية فجيهة الشرق من لبليدة اللي اظهرلو الله تعالى فيها. وابنا خيمتو امبين بيت إيل اللي فالغرب ومدينة عاي اللي فالشرق. وابنا فم مذبح لله تعالى وصلى فيه. ⁹ومن فم كيم ماشي واعد النقب اللي فالجنوب. ¹⁰والين أخلك جفاف فارض كنعان، كام أبرام وامشا واعد مصر يسكن فيها شي من الوقت بيهلي الجفاف كان امتين فلارض. ¹¹والين كرب من مصر كال لساراي اعيالو: أنا نعرف عنك امرة زينة، ¹²والين يشوفوك المصريين لاهي يكلو عنك اعيالي، ويكتلونني، ويمشو بيك امعاهم. ¹³كوليلهم اصا عنك اختي ونسلكو من المشاكل ونجبرو العافية بسببك انتي. ¹⁴والين ادخل أبرام مصر شافو أهل مصر اعلن اعيالو امرة زينة.

15 وشافوها املي عمال فرعون وخبرو فرعون بجمالها ، وامشاو بيها شور
قصر. 16 ولا ابخل شي من شي متعدل لأبرام بسبب ساراي، واعطاه لغنم
ولبكر ولحمير ولعبيد ولخدم والبل.
17 يغير ما ابطا فرعون يلين ابلاه الله تعالى هو وأهلوا بامراض خطيرة
بسبب اعلنو اكبظ ساراي زوجة أبرام وحاول يتعرض امعاها. 18 وپكام
فرعون ومشا لأبرام يجيه وپكالو: انتا ذا اللي عدلتلي شنهو؟ اعلاش ما
اتكولي اعلنها اعيالك؟ 19 اعلاش اتكولي اعلنها ختك اياك نكبظها ونتخيم
امعاها؟ ظرك اصا اسمع، اكبظ اعيالك وامرك بيها. 20 وپكام فرعون ووصا
اعليه ارواكيچ يصيفطوه هو واعيالو وكل أملاكو.

بركة أبرام

أبرام يعطي لأول خوه ارض زينة

¹ وامشا أبرام من مصر وامعاه ساراي ولوط وكل أملاكو شور النقب فكنعان. ² وكان أبرام عندو ياسر من الحيوان والفضة والذهب. ³ وامشا من النقب شور بيت إيل إلى لبليدة اللي كط ابنا فيها خيمتو فلأول، اللي امبين بيت إيل وعاي. ⁴ وهاذي هي لبليدة اللي فيها مذبج مولانا اللي كط ابنا. وفم صلى لله تعالى. ⁵ وكان املي لوط اللي امشا مع أبرام عندو لغنم ولبكر ولخيام. ⁶ وامتلات لارض من أملاكهم يلين ما اتلا فم بل امنين يعيشو فيه فبلد. ⁷ وخلكت اخصومة امبين رعيان أبرام ورعيان لوط فالوقت اللي كانو يعيشو فيه الكنعانيين والفرزيين فلارض.

⁸ وكال أبرام للوط : ما يالتنا نتخاصمو امبيناتنا، ولا يالتهم يتخاصمو رعياننا بيهلي نحنا خوت، ⁹ ولارض واسعة كدامك. خلينا نتفاصلو. وإلين تمشي اعلى زرك العربي، نمشي اعلى زري العسري. وإلين تمشي اعلى زرك العسري، نمشي أنا شور زري العربي. ¹⁰ واتلفت لوط اعلى زرو وشاف واد الأردن كامل يلين صوغر. وكانت لارض املانة من لخطار وكيفت جنة الله تعالى، وتشابه لارض مصر. وهاذا كان سابك يهلك الله تعالى سدوم وعمورة. ¹¹ واختار لوط لراصو واد الأردن كامل، وامشا شور الشرق. واتفرك كلهم عن صاحبو. ¹² واسكن أبرام فارض كنعان، واسكن لوط فابلد لخطار، وابنا اخيامو اكريب من سدوم. ¹³ وكانو أهل سدوم اشرار وعاصين حته لله تعالى.

¹⁴ وكال الله تعالى لأبرام عاكب ما امشا عنو لوط: ركب عينيك واتلفت من حولك من لبليدة اللي انتا فيها، الشمال والجنوب والشرق والغرب، ¹⁵ بيهلي هاذي لارض اللي انتا شايف لاهي نعطيها لك ولنسلك إلى الابد. ¹⁶ ولاهي انعدل نسلك كيفت احصي التراب، إلى عاد آراچاج يكد يحسب احصي

التراب يتمكن من عد ذريتك .¹⁷ كوم وامشي فطول لارض وعرظها بيلى
اعطيتهالك.¹⁸ وكام أبرام وارفد اخيامو وابناهم احذا اصدر ممرا اللي احذا
حبرون. وابنا مذبج لله تعالى فم.

بركة أبرام

أبرام يسلك شعوب

¹وفذاك الوقت اخلك اعلن أمرافل ملك بابل وأريوك ملك ألسار وكدرلعومر ملك عيلام وتدعال ملك جويم ²ادايكو امع بارع ملك سدوم وبرشاع ملك عمورة وشنأب ملك أدمة وشمئير ملك صبويم وملك بالع اللي هي صوغر. ³كلهم اجمع اللي عندو من لجنود فواد السديم اللي ينكالو لبحر الميت. ⁴واللي كانو اعبيد لكدرلعومر مدة 12 سنة، يغير امبلكو واتكبرو اعليه فالسنة 13. ⁵وفالسنة 14 امشا كدرلعومر وأصحابو من الملوك، وغبو الرفائيين فلبليدة ينكالها عشتروت قرنائم. وغبو الزوزيين فلبليدة ينكالها هام. وغبو الإيميين فبطحة قريتايم. ⁶وغبو الحوريين احذا كدية سعيير يلين بيت فاران اللي ماهو ابعيد من الخلوات. ⁷ومن فم رجعو واعدين مدينة قادش، وغبو كل لارض اللي كانو فيها قبيلة العماليق. وغبو املي الأموريين اللي كانو ساكنين فارض حزازون تamar.

⁸وعاكب ذاك كمامو كل من ملك سدوم وملك عمورة وملك أدمة وملك صبويم وملك بالع، ⁹وادايكو امع كدرلعومر ملك عيلام وتدعال ملك جويم وأمرافل ملك بابل وأريوك ملك ألسار فواد السديم. وكانو أربع ملوك ضد خمسة. ¹⁰وكان واد السديم املان من ظايات الطين. وكل من ملك سدوم وملك عمورة حاولو يهربو امع رجالتهم من الحرب يغير وحلو فالطين واللي اسلك منهم اهرب شور الكدية. ¹¹وكمامو الملوك لخرين لربعة الباكين اللي غلبو فالعرب وكبظو كل شي كان فسدوم وعمورة من أملاك واطعام وامشاو. ¹²وكردو لوط ول خو أبرام اللي كان ساكن فسدوم فهاذا الوقت، وكبظو كل شي كان عندو.

¹³واسلك آراكاج من أهل سدوم وعمورة، وجا لأبرام العبراني ورد اعليه ذا اللي اخلك. وكان أبرام ساكن احذا صدراية اكبيرة اللي فاتراب ممرا، اللي

من الأموريين، وهو خو أشكول وعانر، وكلهم أصحاب لأبرام.¹⁴ وإلين
اسمع أبرام باعلن ول خوہ نحبس، ڪام واڪبظ كل رجالتو اللي اخلاڪة
وكابرین عندو، واللي كان عددهم 318 آراڪاج، وامشا دافع اورا الملوك
الربعة يلين لحڪ مدينة دان.¹⁵ وإلين عاد ليل، ڪام أبرام أوڪسم رجالتو اعلى
فرق، واهجم اعليهم، واغلبهم، وامشا دافع اوراهم يلين لحڪو ابليدة اسمها
حوبه اللي هي شمال دمشق.¹⁶ واڪبظ اللي كانو يملكو، وجاب لوط ول خوہ
وأملاكو ولعليات ولمحابيس لخرين.

¹⁷ وارجع أبرام بعدما اغلب الملك كدرلعومر والملوك لخرين اللي كانو
امعاه. وخاظ ملك سدوم اياك يستقبلو فواد شوى اللي اسمو واد الملك.
¹⁸ وكان ملكيصادق ملك ساليما مع ملك سدوم. واعطا ملكيصادق لأبرام
شي من امبورو وشي من عصير العنب. وكان راجل من رجالة مولانا
العظيم.¹⁹ وبارك أبرام وڪالو:

اعليك بركة مولانا العظيم
اللي خلڪ السما والتراب،
²⁰والحمد لمولانا العظيم
اللي نصرك اعلى أعدائك.

واعطاه أبرام العشر من كل شي كان عندو.²¹ وعاڪب ذاك ڪال ملك سدوم
لأبرام: لاهي نڪبظ الرواڪيج وانتا تڪبظ الباڪي.²² وڪالو أبرام: احلفت اعلى
الله تعالى اللي خلڪ السما والتراب،²³ اعطني ما نڪبظ أي شي من ذا اللي
عندك اياك ما اتڪول اعطني اجبرت الخير من عندك.²⁴ ولاني لاهي نڪبظ
من عندك ماهو اللي كالو رجالتي. يغير اصا الرجالة اللي امشاو امعاي
فالحرب واللي هو ما عانر وأشكول وممرا، خليهم يجبرو ڪرعتهم.

بركة أبرام

مولانا يعطي لأبرام علامة اعلى اخلاية اللي لاهي يورثو

¹ وعاكب يلين خلكت هادي لأمر، كمال الله تعالى لأبرام فحلم: لا تخاف من شي. أنا نحميك وأجرك اكبير عندي. ² وكال أبرام: يا مولانا يا ربي شنهي اصا فايده الخير اللي تعطيني. أنا ما نجبر لأولاد، واللي لاهي يورثني هو أليعازر اللي من دمشق. ³ وكال املي أبرام: انتا ما اعطيتني لأولاد وذا هو لعبد اللي اخلاية عندي لاهي يورثني. ⁴ وكالو الله تعالى: ذا لعبد ماهو لاهي يورثك. اللي لاهي يورثك لاهي يوظ من صلبك. ⁵ ووظ الله تعالى أبرام شور كدام خيمتو وكالو: خرص السما واعد النجوم إلى كديت. وكالو الله تعالى: كد عدد النجوم لاهي يعود كد نسلك. ⁶ وصدق أبرام الله تعالى واعتبر الله تعالى أبرام إنسان صالح.

⁷ وكالو: أنا هو الله تعالى اللي جابك من أور الكلدانيين اياك انورثك هادي لارض. ⁸ وكال أبرام لله تعالى: ابسيمحالة لاهي نعرف اعلمي لاهي نورثها؟ ⁹ وكالو الله تعالى: اكبظلي عجلة وعنز وكبش اعمر كل منهم 3 سنوات. وكبظلي املي احمامتين. ¹⁰ وكبظهم أبرام وشكهم من الوسط اعلى نصين واجعل كل نص امقابل النص لوخر، والطيور ما كسهم. ¹¹ والين كامت الطيور لخلا تنزل وتوكل من الجيفة، صاعهم أبرام.

¹² والين الحك لمغرب، اركد أبرام اركاد امتين، وفذا جات اعليه الظلمة لمدينة ونخلع. ¹³ وكالو الله تعالى: عود متيقن اعلن نسلك لاهي يتغرب فارض ماهي لهم، ولاهي يستعبدوهم أهلها ويحكروهم مدة 400 سنة. ¹⁴ يغير لاهي انخلص لهم من ذاك الشعب اللي أستعبدهم، وعاكب ذاك لاهي يوظو بياسر من لأملاك. ¹⁵ وانتا لاهي اتموت فالعافية وتندفن بشيبة صالحة. ¹⁶ وهوما لاهي يرجعو هون عاكب أربع اجيال. بيهلي اثم الأموريين اللي ساكنين هون ما فات عادت ياسرة اياك يعاقبهم الله تعالى

اعليها .¹⁷ وإلّين غربت الشمس وجات الظلمة، اظهر اعمود من الدخان
واشهاب من النار واخطين امبين طشات اللحم.¹⁸ وفذاك اليوم عدل الله تعالى
عهد امع أبرام وكالّو: لاهي نعطي هاذي لارض لنسلك من نهر مصر إلى
نهر لكبير، نهر الفرات،¹⁹ ابلاد القينيين والقنزيين والقدمونيين²⁰ والحيثيين
والفرزيين والرفائيين²¹ ولأموريين والكنعانيين والجرجاشيين واليبوسيين.

بركة أبرام

اعيال أبرام اتلود للوريث من خلال هاجر

اخلاية إسماعيل لأبرام

¹وساراي اعيال أبرام كانت امرة عاكر. وكانت عندها خادم مصرية اسمها هاجر. ²وكانت ساراي لأبرام: الله تعالى ما اعطاني الذرية. كوم اصا اتكي امع هاجر. كان الله تعالى يعطيني الذرية منها. وعدل أبرام ذا اللي كالتلو ساراي اعيالو. ³وكانت ساراي واعطاتو خادمها وعاشرها. وهذا اخلك عاكب ما قضاو 10 سنوات فارض كنعان. ⁴وعاشر أبرام هاجر وحملت منو. والين عرفت أنها حملت، عادت تحكر عربيتها ساراي. ⁵وفذا كانت ساراي لأبرام: الله تعالى يحاسبك اعلى ذا اللي اخلكي. عاكب ما اعطيتك خادمي وحملت منك، عادت تحكرني. الله تعالى يقضي بيني وبينك. ⁶وجاوبها أبرام وكمالها: هاذي خادمك كدامك وعدليلها اللي اتدوري. وعذبت ساراي هاجر يلين هربت اعليها.

⁷واجبرها ملاك الله تعالى اكريب من ظاية الماء فطريك اللي واعدة مدينة اسمها شور. ⁸وكمالها ملاك الله تعالى: يا هاجر يا خادم ساراي، من امنين جاية؟ وامنين واعدة؟ وكمالها هاجر: أنا اهربت من عربيتي ساراي. ⁹وكمالها ملاك الله تعالى: رجعي شور عربيتك وسمعيها. ¹⁰وكمالها املي: لاهي انكتر نسلك يلين يعود ما يكد ينعد.

¹¹وكمالها املي: انتي موجوعة ظرك ولاهي تبراي اعلى اطفيل، ولاهي اتسميه إسماعيل اللي معناه الله تعالى يسمع. بيهلي الله تعالى حس بالأماك. ¹²واطفيلك لاهي يعود آرا كاج امتين وامعادي الناس كاملة والناس كاملة امعاديتو. ولاهي يعود آرا كاج مستحش ومتكبر اعلى اخوتو كاملين. ¹³وحمدت هاجر الله تعالى اللي شافها وحس بالأماها وكمالها: أنا شفت ظرك اللي يراعي في. ¹⁴ولذاك أسمات هاذي الحاسي باسم: حاسي الحي اللي

يراعي فيّ. وهاذي الحاسي هي موجودة امبين قاش وبارد. ¹⁵ وعاكب ذا
خلات هاجر لأبرام ولو. وسما أبرام اطفيلو اللي من هاجر باسم إسماعيل.
¹⁶ وكان أبرام فذا الوقت عندو 86 سنة.

بركة النبي إبراهيم

مولانا بيارك النبي أبرام باسم اجديد هو ابراهيم

مولانا يعدل ازيانة هي علامة عهدو

¹والين عاد أبرام عندو 99 سنة اتجلاّو الله تعالى وپكالو: أنا هو مولانا القادر، امشي پدامي بطريك امسكمة. ²لاهي انعدل عهدي امعاك وانكتر نسلك حته. ³وپكام أبرام واسجد پدام مولانا. واتكلم امعاها مولانا وپكالو: ⁴اراعيني لاهي انعدل عهدي امعاك ولاهي اتعود بو ياسر من لأمم. ⁵ومن ظرك ما اتلا لاهي ينكالك أبرام اللي معاناه ابو لمعظم، يغير لاهي ينكالك النبي إبراهيم اللي معناها بو ياسر من لأمم. بيّلي لاهي انعدل منك ياسر من الشعوب. ⁶ولاهي اتعود آراپاج فايديتو ياسرة، ولاهي يتفرع من نسلك ياسر من الشعوب، ولاهي يوخظو من نسلك ملوك. ⁷ويعود عهدي إلى الأبد امبيني وبينك وامبين نسلك عاكبك جيل اورا جيل. وانعودلك إله ولنسلك من بعدك ⁸ونعطيك انتا ولذريتك من بعدك ارض كنعان كاملة، اللي اسكنتها متغرب، لكم الدهر كامل وانعود إلههم. ⁹وپكال مولانا للنبي إبراهيم: احفظ عهدي انتا وذريتك من عاكبك مادامو حيين. ¹⁰هاذا هو العهد اللي امبيني وبينك وامبين ذريتك من بعدك اللي يالتكم تحفظوه: يُزَيِّنو الذكور كاملين اللي عندكم. ¹¹اتزينو كل اذكوركم كاملين واتعود علامة العهد اللي امبيني وامبينكم. ¹²اتمو زينو اذكوركم كاملين من بو 8 أيام اسوا من ذريتك وللا من ذرية حد مشري من فظتك ماهو من نسلك. ¹³يالة يُزَيِّن كل اطفيل اخلك فدارك وللا مشري بالفضة، واتعود علامة عهدي إلى الأبد فلحمكم. ¹⁴والذكر اللي فيكم ما أزيّن ينصاع من دار أهلو بيهلي خالف عهدي. ¹⁵وپكال مولانا للنبي إبراهيم: وساراي اعيالك لا تيت اتكولها ساراي من ظرك، يغير لاهي يعود اسمها سارة اللي معناها لأميرة. ¹⁶ولاهي انباركها، ولاهي نعطيك اطفيل منها، ولاهي انباركها وانعدلها أم لياسر من الشعوب.

ومنها لاهي يوخظو ملوك. ¹⁷ واسجد النبي إبراهيم واطحك وڤال امبينو امع راصو: اثرو يصح يخلك اطفيل لراجل بو 100 سنة ؟ واثرو يصح تبرا سارة وهي أم 90 سنة ؟ ¹⁸ وڤال النبي إبراهيم لمولانا: وإسماعيل ياريتو يُحظّر من بركتك. ¹⁹ وڤالو مولانا: اللي لاهي تبرا هي سارة اعيالك، ولاهي يخلكك منها اطفيل، واتسميه إسحاق. لاهي انعدل عهدي إلى الأبد امعاه وامع ذريتو من بعدو. ²⁰ أما اصا إسماعيل فأستجبت لطلبتك لو. لاهي انباركو حته، ولاهي يعود فايدتو ياسرة، ولاهي انكثر نسلو، ولاهي يعود بو للثاني عشر رئيس. ويعود شعب اكبير. ²¹ يغير عهدي لاهي يعود امع إسحاق اللي لاهي يجي من سارة كيف هاذا الوقت من السنة الجاية. ²² وإلّين اوفامولانا من لكلام امع النبي إبراهيم امشا عنو. ²³ وفذاك النهار اكبظ النبي إبراهيم ولو إسماعيل والذكور كاملين اللي خلّكو فدارو والذكور كاملين اللي اشرا، وزينهم، وعدل ذا اللي ڤالو مولانا. ²⁴ وكان النبي إبراهيم عندو 99 سنة وقت ازيانتو. ²⁵ وإسماعيل ولو وقت ازيانتو عندو 13 سنة. ²⁶ وتمت ازيانة النبي إبراهيم وإسماعيل ²⁷ والذكور كاملين اللي خلّكو فدارو واذكور كاملين اللي اشرا فنفس اليوم.

بركة النبي إبراهيم

النبي إبراهيم يتشفع لسدوم وعمورة

¹وعاكب ذاك اظهر الله تعالى للنبي إبراهيم عند صدراية ممرا، وقت اللي كان كاعد كدام فم خيمتو لكايلة. ²وفذا ركب وجهو وشاف اثلت رجالة ماشين اعلى جيهتو، وادفع شورهم اياك يرحب بيهم. والين لحكهم، كيام واسجد اعلى التراب إحترام لهم. ³وكال: يا شيخي إلى عدت شايف عن عبدك يستحق الشرف عنك تستراح عندو، لا تتخطاه. ⁴وخليني انجيب لكم شي من الما تغسلو بيه كر عيكم وتكعدو تحت ظل الصدرية. ⁵وانجيب لكم شي من امبورو توكلوه ومن فم توصلو مشيكم واتعودو خظتو اعلى خيمة عبدكم. وكالولو: ما فم مشكلة، عدل ذا اللي كلت. ⁶وادفع النبي إبراهيم واعد خيمتو اللي فيها سارة وكالها: كومي بالعجلة وعجني 3 كيلات اكبار من الدكيك الزين وخزيهم. ⁷وكام النبي إبراهيم وادفع شور امراحو واكبط اعجل اسمين واعطاه لجديع عندو ينصبو. ⁸وعاكب ذاك اكبط النبي إبراهيم شي من الزبدة ولبن ولعجل اللي انطبخ، واطرح ذا كدامهم، وابكا واكف كدامهم يخدمهم تحت الصدرية وهو ما يوكلو. ⁹وكالولو: وينهي اعيالك؟ كآلهم النبي إبراهيم: اراعيها فالخيمة. ¹⁰وكال واحد منهم للنبي إبراهيم: لاهي نرجعلك فهاذا الوقت من السنة الجاية ولاهي اتعود سارة عادت باطفيلها منك. وذا الوقت كانت سارة واكفة اوراه عند فم الخيمة وسمعت اكلامهم. ¹¹وكان النبي إبراهيم وسارة اكهولة اكبار فالسن واتخطات سارة سن لحمل. ¹²وظحكت سارة امبينها امع راصها وكالت: عاكب ما استكهلت وعاد راجلي شيباني نجبر لعيال؟ ¹³فذا كال الله تعالى للنبي إبراهيم: اشواسا سارة تضحك واتقول: انكد نبرا اعلى اطفيل وأنا كهلة؟ ¹⁴الله تعالى اثرو يكلبو شي؟ لاهي نرجعلك فهاذا الوقت من السنة الجاية واتعود سارة عادت باطفيلها منك. ¹⁵وانخلعت سارة ونكرت اعلنها ظحكت. وكالها الله تعالى:

ماهي حِكْ انتي اضحكتي اِكبال!

¹⁶ وعاكِب ذاك كِامو الرجالَة الثلاثة ماشين اعلَى جيهَة سدوم، وامشا امعاهم النبي اِبراهيم يسيفطهم. ¹⁷ وِكال الله تعالى اللي هو واحد من الرجالَة الثلاثة : ما انكِد نَجِد عن اِبراهيم اللي ناوي انعدِل لسدوم. ¹⁸ وِابراهيم لابد من يعود بو شعب اكبير وامتين وتتبارك شعوب لارض كاملة بسببو .
¹⁹ ببلي انا هو اللي اخترتو اياك يوصي اولادو وأهلُو من بعدو اياك يحفظو الطريقَ الله تعالى، امعدلين البر والعدل يلين يعدل الله تعالى اللي اتعهد بيه للنبي اِبراهيم. ²⁰ وِكال الله تعالى: اِكثارة الشكوى والظلم اعلَى أهل سدوم وعمورة وشرهم زاد اعلَى حدو. ²¹ لاهي انكيسهم وانشوف إلى عاد ذا حِكْ ونتأكد بنفسي.

²² وامشاو الرجالَة اللي كانو امع الله تعالى واعدين سدوم ، وابكا النبي اِبراهيم واكف امع الله تعالى. ²³ وِكرب النبي اِبراهيم منو وِكالُو: لاهي تهلك الصالح امع الشرير؟ ²⁴ يلين تجبر فذي المدينة 50 آرِكاج صالحة لاهي تهلكها وللا لاهي اتسامحها اعلَى أساس هاذو الخمسين الصالحين؟ ²⁵ انتا اعظم من اللي اتخلط امبين الصالح والشرير، ويعود الصالح كيف الشرير حشاك. ما يصح اعلَنك انتا الديان ما تَعْدِل؟ ²⁶ وِكال الله تعالى للنبي اِبراهيم : يلين نجبر فسدوم الا 50 آرِكاج صالحة انسامح الباكين. ²⁷ وِكال النبي اِبراهيم: انا كثرْت من لكلام امع الرب امع اعلني مخلوق من التراب والرماد. ²⁸ وفحالتهُم نقصو 5 ارواِكيج صالحين لاهي تهلك المدينة اعلَى أساس 45؟ وِكالُو : يلين نجبر فيها 45 صالحين ما نهلكها. ²⁹ وِكالُو النبي اِبراهيم مرة ثانية: وفحالتك اجبرت الا 40 آرِكاج صالحة؟ وِكالُو : ماني لاهي نهلكهم اعلَى أساس 40 الصالحين. ³⁰ وِكال النبي اِبراهيم: لا تنفكع اعلِيّ واسمحي نتكلم، وفحالتك اجبرت الا 30 صالحين؟ وِكالُو: ماني لاهي نهلكها إلى اجبرت فيها 30 صالحين. ³¹ وِكال النبي اِبراهيم: انا نعرف اعلني كثرْت لكلام امعاك، يغير فحالتك اجبرت الا 20 صالحين؟ وِكالُو : ماني لاهي نهلكها يلين نجبر فيها 20. ³² وِكال النبي اِبراهيم: لا تغضب اعلِيّ يا رب إلى اتكلمت وِكَلتلك إلى اجبرت فلمدينة الا 10 صالحين؟ وِكالُو : ماني لاهي نهلكها إلى اجبرت فيها 10. ³³ وعاكِب ما اؤفا الله تعالى من

لكلام امع النبي إبراهيم، امشا وارجع النبي إبراهيم شور بلو.

بركة النبي إبراهيم

ول خو إبراهيم يسلك من أهل سدوم

¹ و جاو الملايكة لأثنين لمدينة سدوم امع اغروب الشمس. وذا الوقت كان لوط كاعد احذا بوابة سدوم. وإلين شافهم كيام واكف واعدهم يستقبلهم، واسجد بوجهو اعلی التراب إحترام لهم. ² و كالأل: يا شيوخی استراحو و باتو فدار عبدكم ایاك انقضو لیلتكم وتغسلو كر عیكم، وامع الصبح اتواصلو اطریكم. و كالألو: ابدي لاهی انقضو لیلتنا لكدام. ³ یغیر لوط الح اعلیهم یلین كبلو یمشو امعاه و یباتو فدارو. وعشاهم واخبزلهم امبورو وكالو.

⁴ وسابك یركدو اجتمعو اعلیهم اكهولة وفكاریج مدينة سدوم كدام الدار. ⁵ وعیطو لوط و كالألو: وین هوما الرجالة اللی بایتین عندك اللیلة ؟ وخطهم شورنا ایاك انلوطوهم. ⁶ وخاظ شورهم لوط واكفل الباب اوراه ⁷ و كالأل: لا اتعدلو المعصية یا خوتي. ⁸ اراعی عندي منتین اعزیبات. لاهی انوخطهم لكم ایاك اتعدلو امعاهم اللی تبغو. أما اصا ذو الرجالة لا اتعدلولهم شی ما ینفع بیهلی ضیوف عندي. ⁹ و كالألو: اكحز ابعد عنا ! و كالأو املی: ذا آرکاج اللی جا یسكن عندنا عاد هامو یتحكم فینا. ظرك اصا لاهی انعدلوك شی أطم منهم هوما. واتكدمو واعدین لوط لاهی یدكدكو الباب. ¹⁰ فذا الرجالة اللی هوما خطار لوط مدو ایدیهم وحكموه ودخلوه وسط الدار، و كفلو الباب. ¹¹ وخبطو بلعما ارواکیج اللی کانو واكفین كدام الباب، اصغیرهم واكبیرهم، یلین عاد قالیهم یجبرو بل امنین الباب.

¹² و كالأو الرجالة لأثنين للوط : مندر ا یکان عندك أقارب فالمدینة: انساب وللا أولاد وللا امنات وللا أي آرکاج اوخر اکریب منك؟ وخطهم من هاذی المدینة ¹³ بیهلی نحنا هامنا اندمرو هاذی لبلیدة بیهلی كثرة الشکوی من شرها عند الله تعالی، وارسلنا ایاك اندمروها. ¹⁴ وامشا لوط یعلم الرجالة اللی کانو لاهی یتخیمو امع امناتو و كالأهم: کومو الفوک و اوخطو من هاذی

لبليلة بيهلي الله تعالى لاهي يدمر هاذي المدينة. ولا جد اعليهم اكلامو.
15 وإلّين عاد الفجر الحو الملايكة لأثنين اعلّى لوط وكمالولو: يقوم الفوك
واكبظ اعيالك وامناك اللي امعاك اياك ما تهلك بسبب اثم أهل المدينة.
16 يغير يلين ابطا لوط حكمو الرجالة بايديه وايدين اعيالو وامناو وامشاو
بيهم شور كدام المدينة بيهلي الله تعالى اشفق اعليهم. 17 وإلّين وخطوهم ابعيد
كّال واحد من الملايكة للوط: سلك روحك ولا اتخرص اوراك ولا توكف
فذي لبليلة كاملة. اهرب اعلّى جبهة لكدا اياك تسلك. 18 وكّال لوط: لا
اتواسيلي ذا يا شيخي، 19 انتا اعرفتلي شي واهتميت بيّ وسلكتني من الموت.
يغير أنا ما انكّد نلجا فلکدا خايف من يخلکلي شي وانموت. 20 اراعي مدينة
اکريب انکّد نهرب شورها. وهي مدينة اصغيرة وخليني نلجا شورها. امالها
مدينة اصغيرة حتّه؟ وانکّد أنسلک فيها روعي؟ 21 وكّالو الملاك: أنا اکبّلت
طالبك ولاني لاهي اندمر ذي المدينة الصغيرة. 22 اهرب شورها بالعجلة
بيهلي ما انکّد انعدل شي لسدوم سابک توصل انتا لهاذي المدينة الصغيرة.
ولهذا السبب أسماّت هاذي المدينة باسم صوغر اللي معناها الصغيرة.
23 وإلّين ظهرت الشمس اعلّى لارض، الحک لوط صوغر. 24 وفذا امطر
الله تعالى اعلّى سدوم وعمورة کبريت ونار من السما. 25 واحرّک الله تعالى
ذیک لارض واللي ساکنين فيها والوديان اللي حذاها وكل ارضهم كاملة اللي
محروثة. 26 واتلفتت اعيال لوط اللي كانت اوراه بيها اکبيظ لقبة واتحولت
شور اعمود من الملح .

27 وامشا النبي إبراهيم امع الصباح شور لبليلة اللي وكف فيها کدام الله
تعالى. 28 وخرص اعلّى جبهة سدوم وعمورة واعلى لارض اللي امجاورتهم
وشاف الدخان طالع اعلّى شکل اعمود. 29 وعاکب ما دمر مولانا هاذي
لبليلة، ما انسا وعدو للنبي إبراهيم ووظ لوط سابک يدمر المدينة اللي كان
ساکن فيها.

30 وعاکب ما دمر مولانا سدوم وعمورة، امشا لوط وامناو من صوغر،
واسکنو فلکدا بيهلي کان خايف من السکن فصوغر. والجاهو وامناو
فامغارة فالکدية. 31 وكّالت منتو لکبيرة لختها الصغيرة : نحنا بونا يستکهل
ولارض ما اتلاو فيها رجالة يتخيمو امعانا كيف الناس كاملة. 32 اتعالي اصا

نسكوه شي من الخمر ونتكو امعاه اياك ما تنقطع ذرية بونا.³³ واسكواو
الخمر لبوهم فذيك الليلة، وكامت المنت لكبيرة واتكات امعاه . ولا حس لوط
بتكيها امعاه ولا اكيامها.³⁴ وفانهار اللي اوراه كالت المنت لكبيرة لختها
الصغيرة: أنا اتكيت امع بوي البارح . وهاي نسكوه الخمر هاذي الليلة املي
وتدخلي شورو انتي وتتكي امعاه، ونجبرو من بونا ذرية.³⁵ واسكواو بوهم
الخمر فذي الليلة الثانية وكامت المنت الصغيرة واتكات امعاه. ولا حس لوط
بتكيها امعاه وللا اكيامها.³⁶ وبهاذا السبب حملو امنات لوط من بوهم.
³⁷ وابرات المنت لكبيرة اعلى اطفيل سماتو مؤاب اللي معناه من بوي، وهو
بو قبيلة المؤابيين إلى اليوم.³⁸ والمنت الصغيرة ابرات املي اعلى اطفيل
وسماتو بن عمي اللي معناه ول أهلي، وهو بو قبيلة بني عمون إلى اليوم.

بركة النبي إبراهيم

مولانا يسلك اعيال النبي إبراهيم

النبي إبراهيم يصلي من أجل اسلاكة شيخ الفلشطييين

¹ وارحل النبي إبراهيم من قم واعد ارض النقب اللي فالجنوب واسكن امبين مدينة قادش ومدينة شور وقضا شي من الوقت فمدينة جرار. ² وفم كمال النبي إبراهيم عن سارة اعيالو: هاذي اختي. وارسل أبيمالكك ملك جرار امراسيل يجيبولو سارة. ³ واتجلا مولانا لأبيمالكك فحلم فالليل وكالو: انتا لاهي اتموت بسبب اعلناك اكبضت امرة متخيمة. ⁴ يغير أبيمالكك لحكو ذا مافات مسها وكال لمولانا: لاهي تكتلني وتكتل أمة بريئة؟ ⁵ امالو كالي اعلنها اختو وهي املي كالتلي اعلنو خوها؟ ما عدلت ذا اللي عدلت يكون شاك عنو صالح ونيتي كانت زينة. ⁶ وكالو مولانا: أنا نعرف اعلناك نيتك كانت زينة، ولذاك امنعتك من اطيح فالمعصية واتمس سارة. ⁷ ظرك اصا رجع للراجل اعيالو بيهلي هو نبي، اياك يطلب لك مولانا وتحيا. وإلى ما رجعتها اعراف اعلناك انتا وذا اللي لك ميتين قطعاً.

⁸ وبكر أبيمالكك امع الصباح وعيط لعبيدو كاملين، ورد اعلهم ذا اللي اخلك، وانخلعو كاملين خلعة امتينة. ⁹ وعيط أبيمالكك للنبي إبراهيم وكالو: اللي عدلتنا شنهو؟ شنهو الخطأ اللي عدلتك اياك اتجيلي واتجيب لمملكتي هاذا الذنب لكبير؟ انتا عدلتلي شي خاسر ما كان يالتك اتعدولي. ¹⁰ وسول أبيمالكك النبي إبراهيم: شخلاك اتعدل هاذا؟ ¹¹ وكالو النبي إبراهيم: أنا عدلت ذا اللي عدلت بيهلي شكيت اعلن هاذي لبليدة ما فيها حد خايف من مولانا، وخفتكم تكتلونني اعلى أساس اعيالي. ¹² أوفي الحقيقية هي اختي منت بوي ولا هي منت أمي واتعرست امعاها. ¹³ وإلين ادعاني مولانا اياك نمشي عن دار بوي، كتلها: ابلد امنين نمشو كولي اعلي خوك واتعودي عدلتلي غاية اكبيرة.

¹⁴واكبظ أبيمالك اغنم وابكر واعبيد واخدم واعطاهم للنبي إبراهيم،
ورجعلو سارة اعيالو. ¹⁵وكل أبيمالك: هاذي ارضي كدامك واسكن ابلد
امنين تبغي فيها. ¹⁶وكل لسارة: اراني اعطيت لخوك ألف قطعة من الفضة .
انبرئك بيها من لإساءة كدام الناس اللي امعاك، وانتي بريئة كدام كل واحد.
وابهاذي الطريقة اتعود رجعتك كرامتك. ¹⁷واطلب النبي إبراهيم مولانا
اياك يشفي أبيمالك. وابرات اعيالو وخدمو ¹⁸بيهلي مولانا ابلو اعيال وكل
اخدم أبيمالك بلعكار بسبب سارة اعيال النبي إبراهيم.

بركة النبي إبراهيم

مولانا يسلك النبي إسماعيل

النبي إبراهيم يعدل عهد سلام امع الفلشطييين

¹وعاكب هاذي لحداث انعم الله تعالى اعلى سارة واعطاها ذا اللي أو عدها بيه. ²وحملت سارة وابرات اعلى اطفيل لإبراهيم فنفس الوقت اللي كط كآلو مولانا. وكان النبي إبراهيم فذا الوقت مستكهل حته. ³وكام النبي إبراهيم وسما اطفيلو اللي اجبر من سارة إسحاق. ⁴وكام زيتو فاليوم الثامن كيف ما اطلب مولانا. ⁵ووقت اخلاكة إسحاق كان النبي إبراهيم عندو من لعمر 100 سنة. ⁶وكالت سارة: أنا ظحكني مولانا. وكل الناس اللي تسمع ذي اللي اخلك يضحكو هو ما املي. ⁷وكالت سارة املي: من كان يكدي يقول للنبي إبراهيم اعلن سارة لاهي اترضع أولاد؟ وارا عيني أنا ابريتلو اعلى اطفيل فاستكهيلو. ⁸واكبر إسحاق وانفطم وعدل النبي إبراهيم وقت فطيم إسحاق ندوية اكبيرة. ⁹وفواحد من انهارات شافت سارة اعلن إسماعيل ول هاجر المصرية يجوق فإسحاق. ¹⁰وكالت سارة للنبي إبراهيم: صوع هاذي الخادم هي وولها بيهلي ول هاذي الخادم ماني كابلتو يورث امع ولي إسحاق. ¹¹ولا ازيان هاذا عند النبي إبراهيم اعلى أساس ولو إسماعيل. ¹²وكال مولانا للنبي إبراهيم: لا تنفكع من امردة الطفيل وأمه. واسمع لكلام سارة وعدل ذا اللي كاتلك بيهلي من إسحاق اتعود لك ذرية. ¹³ولاهي نجعل من ول الخادم املي أمة اكبيرة بيهلي هو من ذريتك. ¹⁴وانهار من غد كام النبي إبراهيم امع الصباح واكبط شي من امبور و كربة ماء واعطاهم لهاجر ودارهم اعلى اكتافها وصاعها هي امع اطفيلها. وكيمت ماشة وذهبت فخلوات بئر السبع. ¹⁵والين افرق اعليها ماء لكربة، طرحت الطفيل تحت وحدة من الصدرايات. ¹⁶وكعدت امكابل 100 متر كدامو بيهلي كالت: ما نبغي نحظر لموت اطفيلي. وكعدت تزكي وعادت تبكي. ¹⁷واسمع مولانا بكي الطفيل،

وفذا عيط ملاك مولانا لهاجر من السما وكالها: انتي اشفاكعك يا هاجر؟ لا تخافي بيهلي مولانا اسمع بكي الطفيل من لبليدة اللي فيها. ¹⁸ كومي ورفديه وضميه شورك. بيهلي لاهي انعذلو أمة اكبيرة. ¹⁹ وافتح مولانا عينين هاجر ونعتلها حاسي من الماء. وامشات واملات لكربة واسكات الطفيل. ²⁰ وكان مولانا امع الطفيل. والين اكبر إسماعيل، اسكن فخلوات فاران و عاد اخباري فارماية السهم. ²¹ وعرستو أمو امع امرة مصرية.

²² وفذا الوقت كمال أبيمالك وقائد جيشو فيقول للنبي إبراهيم: نحنا لاحظنا اعلن مولانا امعاك فكل شي اتعدلو ، ²³ واندورك ظرك تحلفي اعلى مولانا اعلنك مانك لاهي تغدر بيّ ولا تغدر بنسلي ولا أولادي، واحلفي اعلنك لاهي تعرف شي لشعبي اللي اتغربت بينهم كيفما أنا احسنت اعليك. ²⁴ وكال النبي إبراهيم: راني حالفاك .

²⁵ وعاتب النبي إبراهيم أبيمالك اعلى أساس الحاسي اللي كبطوها اعبيد أبيمالك بالقوة. ²⁶ وكال أبيمالك: أنا ما نعرف من اكبظ هاذا الحاسي، وانتا املي ما كلتلي من اكبظها. وأول مرة نسمع بذا هو اليوم. ²⁷ وفذا اعطا النبي إبراهيم لأبيمالك اغنم وابكر واكطع كلهم امع لوخر عهد. ²⁸ وعزل النبي إبراهيم اسبع انعاج من غنمو اعلى زر. ²⁹ وكالو أبيمالك: شنهى الغاية من اعزىل هاذا اسبع انعاج وحدهم؟ ³⁰ وكالو النبي إبراهيم: هاذا اسبع انعاج انكدمها بين ايديك تشهد اعلي أنا هو اللي احفرت هاذا الحاسي. ³¹ ولهاذا السبب سما هاذا لبليدة بئر السبع اللي معناها حاسي الحلفة. بيهلي أبيمالك والنبي إبراهيم كل واحد منهم احلف فم. ³² وبهاذا الطريقة كطعو لأثنين عهد امبيناتهم فبئر السبع. ومن فم كيام أبيمالك وفيقول قائد جيشو ورجعو شور ارض الفلشطييين. ³³ واغرس النبي إبراهيم نوع من الصدر كيف الكنات فبئر السبع وصلى فم لله تعالى لئله اللي كان موجود سابك كل شي. ³⁴ واسكن النبي إبراهيم فارض الفلشطييين ياسر من الزمن.

بركة النبي إبراهيم

مولانا بيارك النبي إبراهيم اعلى اساس طاعتو للتضحية بولو إسحاق

¹ وبعده يلين اسكن النبي إبراهيم فارض الفلشطييين، كيام مولانا وأمتحن النبي إبراهيم وعيطلو: يا إبراهيم! وكال النبي إبراهيم: اراعيني يا مولانا.
² وكال مولانا للنبي إبراهيم: اكبظ ولك إسحاق اللي امعاك واللي تبغي، وامشي شور ارض المريا، وذبحو فم، وحركو، وكدمو كيفت قربان اعلى وحدة من ذوك لكدا اللي لاهي انعتلك.

³ وانهار من غد او عا النبي إبراهيم امع الصباح واحزم اعلى احمارو، وامشا امعاه بأثنين من اعبيدو وامعاهم ولو إسحاق، وجهاز لحطب اياك ينحر اعليه القربان، وامشا اعلى جبهة لبليدة اللي كالأو مولانا.⁴ وانهار الثالث ركب النبي إبراهيم وجهو وشاف لبليدة اللي كالأو مولانا من ابعيد.
⁵ وكال النبي إبراهيم للعبيد اللي امعاه: ابكاو هون امع لعمار اياك نمشي آنا امع الطفيل وانصلو لمولانا، ومن فم نرجعولكم.⁶ وكيام النبي إبراهيم ورقد إسحاق لحطب، وارقد النبي إبراهيم مشعل النار والموس، وامشاو قبلد.
⁷ وكال إسحاق لبوه النبي إبراهيم: يا بوي! وكالأو النبي إبراهيم: اراعيني يا ولي. وكالأو: وينهو لخروف اللي لاهي ينحر كيفت قربان؟ بيهلي إسحاق شاف النبي إبراهيم عندو النار والموس يغير ما شاف لخروف.⁸ وكال النبي إبراهيم لإسحاق: مولانا لاهي يدبر لخروف اللي لاهي ينحر كيف قربان، لا يشطنك شي. وواصلو مشيهم قبلد.

⁹ وإلین لحكو لبليدة اللي كال مولانا للنبي إبراهيم، كيام النبي إبراهيم وابنا فم مذب، واجمع لحطب، وكشف النبي إبراهيم ولو إسحاق ودارو فوك المذب فوك لحطب.¹⁰ ومد النبي إبراهيم ايدو واكبظ الموس اياك يذب ولو إسحاق.
¹¹ وفذا عيطلو ملاك الله تعالى من السما: إبراهيم إبراهيم! وكال النبي إبراهيم للملاك: اراعيني.¹² وكال الملاك للنبي إبراهيم: لا اتركب ايدك

اعلى الطفيل، ولا اتعدلو أي شي. أنا ظرك اعرفت اعلنك خايف من مولانا،
ولا ابخلت ابولك الوحيد اعلى مولانا. ¹³ وخرص النبي إبراهيم اوراه وشاف
كبش متعلق باعراش الصدر. وپام پاسو وجابو وذبحو وحرپو القربان بل
ولو. ¹⁴ وسما النبي إبراهيم ذيك لبليدة باسم يهوه يراه اللي معناه الله تعالى
يدبر. ولهذا السبب ينكال اليوم: فكدية الله تعالى يدبر. ¹⁵ وعيط ملاك الله
تعالى للنبي إبراهيم من السما مرة اخرا ¹⁶ وپال: راعيني نحلفك بيكلي
عدلت ذا اللي اطلبت منك ولا احكمت عني ولك الوحيد. ¹⁷ لذاك لاهي
انباركك وانكثر ذريتك ويعود عددهم كيفت انجوم السما وكيفت احصي
التراب لبحر، ولاهي تورث ذريتك مدن أعدائها. ¹⁸ وبذريتك تتبارك جميع
أمم لارض بيك اللي اسمعتلي. ¹⁹ وعاكب ذاك ارجع النبي إبراهيم شور
اعبيدو لأثنين ورجعو كاملين شور بئر السبع ابلد امنين ساكن النبي إبراهيم.
²⁰ وانكال للنبي إبراهيم عاكب يلين خلكت هادو لأمر: اراعيها ملكة
خلكولها أولاد لخوك ناحور: ²¹ عوصا هو لبكر وخوه بوزا وقموئيل بو أرام
²² وكاسد وحزوا وفلداش ويدلاف وبتوئيل. ²³ واخلط لبتوئيل رفقة. هادو
الثمانية خلاتهم ملكة لناحور خو النبي إبراهيم. ²⁴ واملو خلاتلو خادمو اللي
اسمها رؤومة: طابح وجاحم وتاحش ومعكة.

بركة النبي إبراهيم

النبي إبراهيم يشرف من خلال الشعوب اللي احذاه وقت موت اعيالو¹ وعاشت سارة 127 سنة من لعمر.² وماتت فقريه حبرون فارض كنعان. وجا النبي إبراهيم امتكر اياك ينوح اعلى سارة.³ والين كيام النبي إبراهيم من كدام جثمان سارة كمال للحيثيين: ⁴ أنا خاطر وضيع عندكم وطالبكم تعطوني اقبر ندفن فيه اعيالي اللي ماتت.⁵ وكالولو الحيثيين: ⁶ اسمع يا شيخنا انتا مولانا عدلك زعيم بينا، اكبط تدفن اعيالك فازين اقبورنا، ما فينا حد لاهي يحكمك عن تدفن اعيالك فقبرو.⁷ وكيام النبي إبراهيم وارفع كدام الحيثيين أهل لبلاد يشكرهم.⁸ وكالهم النبي إبراهيم: إلى عدتو تبغوني اصا ندفن اعيالي، فاسمعوني واتوسطولي فعفرون ول صوحر ⁹ اياك يبيعلي امغارة المكفيلة اللي يملك واللي اعلى زر احريثتو، ويبيعها لي بسعرها كامل اياك انعدلها مدفلي.¹⁰ وفذا الوقت كان عفرون الحيثي كاعد امع اجماعتو وكال للنبي إبراهيم كدام كل الحيثيين اللي اجتمعو عند بوابة المدينة: ¹¹ لا يا شيخي اسمعلي، لاهي نعطيك احريثتي ولمغارة اللي فيه هدية مني لك. وشعبي شاهد اعلى ذا، وادفن فيها اعيالك.¹² وارفع النبي إبراهيم يشكر الحيثيين مرة اخرا.¹³ وكال النبي إبراهيم لعفرون كدام الحيثيين: حكا اسمعني، أنا نبغي ندفع صوك لحريثة واكبل مني هاذا اياك انكد ندفن اعيالي فيها.¹⁴ وجاوبو عفرون وكالو: ¹⁵ اسمعني يا شيخي، هاذي لارض قيمتها 5 كيلوات من الفضة، وهاذا لمبلغ بلا قيمة بيني وبينك، وادفن اعيالك.¹⁶ واكبل النبي إبراهيم لمبلغ اللي اعرض اعليه عفرون واوزن النبي إبراهيم لعفرون 5 كيلوات من الفضة كدام الحيثيين حسب الوزنة اللي متعارف اعليها عند تجارهم.

¹⁷ وصبحت احريثة عفرون اللي فالمكفيلة اللي اكريب من ممرا ولمغارة اللي فيها وكل الصدر اللي أفلحريثة ¹⁸ للنبي إبراهيم وهاذا اشهد اعليه كل

الحِيثِيّين الّلي اجتمعو عند بوابة المدينة.¹⁹ وعاكب ذاك چام النّبي إبراهيم
وادفن اعيالو سارة فامغارة المكفيلة اكرّيب من ممرا الّلي هي حبرون فابلاّد
كنعان.²⁰ واملّك النّبي إبراهيم من الحِيثِيّين لحرّثة ولمغارة الّلي فيها وعادو
مدفنلو.

بركة النبي إبراهيم

اعيال إسحاق أباركت بسبب أهلها اياك تجبر ياسر من الذرية

¹ وعاكب فترة من الزمن استكهل النبي إبراهيم حته وباركو الله تعالى فكل شي. ² وكمال النبي إبراهيم لشيخ اعبيدو واللي هو مسؤول عن كل شي فدار النبي إبراهيم: دير ايدك تحت كايمتي، ³ واحلفلي اعلى الله تعالى إله السما ولارض اعلنك ما اتعرس لولي أي امرة من أهل كنعان اللي أنا عايش امبيناتهم. ⁴ وتمشي شور بلدي وفخطي وتكبظ امرة منهم لولي إسحاق. ⁵ وكمال لعبد للنبي إبراهيم: وإلى عادت لمرة اللي لاهي نكبظ لإسحاق ما تبغي تمشي شور هاذي لارض ، وفذي الحالة مندرا يكانك تبغيني انجيب إسحاق للبليدة اللي انتا جاي منها؟ ⁶ وكمالو النبي إبراهيم: عسك من اترجع ولي لقم. ⁷ الله تعالى إله السما اللي اكبظني من دار بوي ومن وطني وتكلم امعاي واحلفلي وكماللي: اندور نعطي هاذي لارض لنسلك. يدور إيمشي كدامك ملاك اياك تكبظ امرة لولي من ارض أهلي. ⁸ وإلين ترفض لمرة تمشي امعاك، اتعود انتا فهادي الحالة عدلت اللي احلفتلي اعليه. يغير لا اترجع ولي لذك لارض. ⁹ ودار لعبد ايدو تحت كايمة النبي إبراهيم واحلف لشيخو اعلنو لاهي يعدل ذا اللي احلفلو اعليه.

¹⁰ واكبظ لعبد 10 اجمال من حيوان النبي إبراهيم ورقد اجمال من كل الخير اللي عند شيخو. وامشا واعد أرام النهرين لبليدة اللي فيها ناحور. ¹¹ وإلين كرب، برك اجمال خارج المدينة احذا حاسي من الماء. وكان هاذا امع مغرب الشمس، وذا كان وقت وخيظ لعليات اياك يوردو فالحاسي. ¹² واطلب لعبد وكمال: يا الله تعالى إله شيخي النبي إبراهيم، يسرلي امري اليوم واحسن اعلى شيخي النبي إبراهيم. ¹³ أنا اراعيني واكف عند الحاسي ولعليات هاذي المدينة لاهي يوخظو يوردو. ¹⁴ ولمرة اللي انكولها: نزلي كدرتك اياك نشرب، وتسكيني وتسكي اجمالي، اتعود هي لمرة اللي اخترت

لعبدك إسحاق. وبهاذي الطريقة انعود اعرفت اعلنك احسنت اعلى شيخي
النبي إبراهيم.

¹⁵ وسابك يوفي عبد النبي إبراهيم دعاؤو، جات رفقة منت بتوئيل ول ملكة
اعيال ناحور خو النبي إبراهيم وكدرتها اعلى اكتفها. ¹⁶ وكانت اشوية
ازوينة حته واعزبية ما كط مسها راجل. وكاست ظاية الماء واملات كدرتها
وكيمت ماشة. ¹⁷ وادفع عبد النبي إبراهيم شورها وكالها: اسكيني اشوي من
الماء من كدرتك. ¹⁸ وكالتلو رفقة: اشرب يا شيخي ونزلت كدرتها بالعجلة
اعلى ايديها واسكاتو. ¹⁹ وعاكب يلين اسكاتو كالتلو: لاهي انجيب املي الماء
لاجمالك اياك نسكيهم. ²⁰ وصبت كدرتها بالعجلة فحوظ الماء ودفعت شور
حاسي وتورد الماء يلين اسكات اجمالو كاملين. ²¹ وكان عبد النبي إبراهيم
امراقبها فذا كامل اللي اتعدل من دون كلام اياك يعرف يكانها هي اللي
اختارها الله تعالى لإسحاق وللا ابدى.

²² وإلّين شربت اجمال، اكبظ لعبد ووخظ حزمة من الذهب وزنها اكريب
من 6 اكرامات ووخظ املي أسوارين من الذهب وزنهم 120 اكرام.
²³ وسول لعبد رفقة وكالها: انتي منت من؟ كوليلى مندرا يكانا انكدو نجبرو
ابليدة انباتو فيها فدار بوك؟ ²⁴ وكالتلو رفقة: أنا بوي هو بتوئيل ول ملكة
وناحور. ²⁵ وكالتلو املي: عندنا لحشيش وياسر من لعلف وعندنا املي ابلد
امنين اتباتو فيه. ²⁶ وفذا اركع واسجد لعبد لله تعالى يشكرو. ²⁷ وكال: اتبارك
الله تعالى إله شيخي النبي إبراهيم اللي ما امنع كرمه ونزاهتو عن النبي
إبراهيم. وكال لعبد: الله تعالى سهداني اعلى دار اخوت شيخي النبي إبراهيم.
²⁸ ودفعت رفقة شور دار أمها وردت اعليها اللي اخلك.

²⁹ وكان عند رفقة خو ينكالو لابان. وكام لابان وامشا واخظ شور لعبد اللي
عند الظاية ³⁰ بيهلي فات شاف حزمة الذهب وأسوارين فايدين اختو رفقة،
واسمع املي اكلام رفقة عن لعبد اللي جبرت، واجبر لابان لعبد واكف احذا
اجمالو اكريب من الظاية. ³¹ وكال لابان للعبد: اتفضل انتا امباركك الله
تعالى. اعلاش انتا واكف الكدام؟ أنا جهزت الدار وجهزت املي ابليدة
يستراحو فيها اجمالك. ³² وكاس لعبد الدار وانزل لابان وعبيدو اللي كانو
رافدين اجمالو واعطاو لاجمال لعبد لحشيش ولعلف، وجابولو شي من الماء

هو واللي كان امعاه اياك يغسلو كبر عيهم.³³ وطرحو كدامو اطعام اياك يوكل ، يغير سابك يوكل كمال: ماني لاهي نوكل سابك ما كيتلكم اللي عندي. وكمال لابان لعبد النبي إبراهيم: اتفضل كول اللي عندك.

³⁴ وكمال للابان: أنا عبد للنبي إبراهيم.³⁵ والله تعالى بارك حتة شيخي النبي إبراهيم وعاد زعيم. والله تعالى اعطاه لغنم ولبكر والفضة والذهب ولعبيد ولخدم والبل ولحمير.³⁶ وخلاتو سارة اطفيل عاكب ما استكهلت واعطاه بوه النبي إبراهيم كل أملاكو.³⁷ واحلفلي شيخي النبي إبراهيم وكمالي: لا اتعرس لولي إسحاق أي امرة من الكنعانيين اللي أنا ساكن فبلادهم.

³⁸ وكمالي: كيس أهل بوي وعيلتي واكبط امرة لولي.³⁹ وكلت لشيخي النبي إبراهيم: وفحالة لمرة اللي لاهي نجبر ابات تمشي امعاي شور كنعان؟⁴⁰ وكمالي النبي إبراهيم: الله تعالى اللي امشيت أنا اعلى اطريكو يدور يمشي ملاكو ويوفقك فمهمتك اياك تكبط اعيال لولي إسحاق من عيلتي ومن أهل بوي.⁴¹ وكمالي شيخي النبي إبراهيم: وإلى جيت لأهلي ورفضو يعطوها لك، فهاذي الحالة نطلصك من الحلفة اللي احلفتي اعليها.

⁴² وكست اليوم الحاسي وإلين الحكتها اطلبت الله تعالى وكتلو: يا الله تعالى إله شيخي النبي إبراهيم، أنا طالبك اتوقفني فاللي اعلى أساسو أنا سافرت.⁴³ أنا اراعييني واكف كدام الحاسي. اندورك تجعل الشويبة اللي لاهي اتجي اياك تورد الماء واللي يلين نطلب منها: تسكيني من الماء،⁴⁴ واتكولي: اشرب انتا وأنا لاهي نسكي اجمالك املي. اتعود هي الشويبة اللي اختارها الله تعالى لإسحاق ول شيخي.

⁴⁵ والوقت اللي كنت نطلب فيه مولانا وانا جي فيه نفسي، فذا شفت رفقة جاية ورافدة كدرة اعلى اكتافها ، وكاست الحاسي تورد الماء وكتلها: طالبك تسكيني.⁴⁶ ودفعت وطرحت كدرتها وكماتلي: اشرب انتا ولاهي نسكي املي اجمالك.⁴⁷ وسولتها: منت من انتي؟ وكماتلي اعلنها منت بتوئيل ول ناحور اللي خلاتو ملكة. واكبطت ودرت الخاتم فاخنافرها والسوار فايديها.

⁴⁸ وكمت واسجدت وباركت الله تعالى إله شيخي النبي إبراهيم اللي سهداني شور الطريق لمسكمة اياك نكبط منت خو النبي إبراهيم لولو إسحاق.

⁴⁹ وظرك كلولي إلى عدتو لاهي اتعدلو ذي الغاية لشيخي النبي إبراهيم ،

وللا طلصوني وخلوني انكيم واعد ابليدة اخرا.
50 وڤالولو لابان هو وبتؤئيل: ذي لمردة جات من عند الله تعالى ونحنا ما
انڤدو انڤولولك اهييه وللا ابدي. 51 رفقة اراعيها ڤدامك. اڤبظها وامشي بيها
اياك اتعود اعيال لول شيخك النبي ابراهيم كيفت ماراد الله تعالى. 52 والين
اسمع عبد النبي ابراهيم اكلامهم، ابرك اعلى التراب ساجد لله تعالى.
53 ووخط لعبد اديار من الفضة والذهب ولباس واعطاهم لرفقة واعطا املي
لخوها وأمها هدايا غالية. 54 وكال واشرب هو ورجالتو وباتو ليلتهم فم.
والين او عاو امع الصباح ڤالهم: اعطوني اطريك اياك نرجع شور شيخي
النبي ابراهيم. 55 وڤالولو خو رفقة وأمها: خلي رفقة تبكي امعانا 10 أيام
وللا ذاك ومن فم تمشي. 56 وڤالهم لعبد: لا تحصروني ، الله تعالى سڤملي
اطريكي ، خلوني نمشي شور شيخي النبي ابراهيم. 57 وڤالولو: لاهي
انعيطو لرفقة وانسولوها عن رأيها. 58 وعيطو لرفقة وسولوها: تبغي تمشي
امع ذا الراجل؟ وڤالتهم: اهييه نبغي نمشي. 59 وخلاو رفقة تمشي وامشات
امعها امرطعتها وعبد النبي ابراهيم ورجالتو. 60 وباركو رفقة وڤالولها:
اعليك بركة مولانا. انتي ختنا عدلي ياسر من الذرية اياك اتعود آلاف مؤلفة
وتورث ذريتك مدن أعدائها.

61 وڤامت رفقة واخدمها وركبو اجمال وامشاو اورا عبد النبي ابراهيم.
وڤكيم لعبد برفقة ماشي بيها. 62 وفذاك الوقت كان إسحاق اللي ساكن فالنقب
ارجع من الطريق اللي ينڤالها حاسي الحي اللي يراعي في. 63 وفدحميساية
امشا واعد الخلوات اياك يتخمم. فذا شاف اجمال جاية. 64 ورفعت رفقة هي
املي عينها وشافت إسحاق، ونڤزت عن اجمالها. 65 وسولت عبد النبي
ابراهيم وڤاتلو: منهو هذا الراجل اللي ماشي فالحرث اياك يتلڤالنا؟ وڤالها
لعبد: هذا شيخي إسحاق. وڤبظت حوليها واتحجبت عنو. 66 وعاڤب ذاك رد
لعبد اعلى إسحاق ذا كامل اللي اخلڤ. 67 ودخل إسحاق رفقة شور خيمة أمو
سارة واتعرس امعها وابغاها حتة واتعزا بيها عاڤب موت أمو سارة.

بركة النبي إبراهيم

عاكب موت النبي إبراهيم بركتو اتكيس ولو إسحاق

¹و عاكب ذا كيام النبي إبراهيم واتعرس امع امرة اسمها قطورة. ²وخلاتلو زمران ويقشان ومدان ومديان ويشباق وشوحا. ³و خلا يقشان شبا ودادان ، وأولاد دادان هو ما الأشوريم وللطوشيم ولأميم. ⁴وأولاد مديان هو ما عيفة وعفر وحنوك وأبيداع وألدعة ، وهاذو كاملين جايين من ذرية قطورة. ⁵وورث النبي إبراهيم للنبي إسحاق كل أملاكو. ⁶واعطا لولادو من خدمو هدايا وقت محدو كان حي، وارسلهم اعلى جبهة الشرق ابعيد عن ولو إسحاق. ⁷وعاش النبي إبراهيم 175 سنة. ⁸ومات النبي إبراهيم بشيية صالحة وانضم إلى اسلافو. ⁹ودفنو إسحاق وإسماعيل بوهم النبي إبراهيم فامغارة المكفيلة فحرث عفرون ول صوحر الحيثي اللي احذا ممرا. ¹⁰وهو الحرث اللي كط اشرا النبي إبراهيم من الحيثيين وفيه اندفنو سارة والنبي إبراهيم فزر بعض. ¹¹و عاكب موت النبي إبراهيم بارك مولانا إسحاق ولو واسكن إسحاق عند الحاسي الحي اللي يراعي في. ¹²وهذا سجل أولاد إسماعيل ول النبي إبراهيم اللي خلاتو هاجر المصرية خادم سارة لإبراهيم. ¹³وهاذي اسامي أولاد إسماعيل مرتبة حسب اخلاكتهم: نبايوت هو بكر إسماعيل وقيدار وأدبئيل ومبسام ¹⁴ومشماع ودومة ومسا ¹⁵وحدار وتيماء ويطور ونافيش وقدمة. ¹⁶وهاذو هو ما اسامي أولاد إسماعيل وعادو الشيوخ للثاني عشر قبيلة فبليدات مختلفة. ¹⁷وعاش إسماعيل 137 سنة ومات وانضم شور اسلافو. ¹⁸واسكن نسلو فبليدة اللي امبين حويلة وشور اعلى حدود مصر اعلى الزر الشرقي من مدينة أشور، وكانو اعلى عداوة امع أولاد عمهم. ¹⁹وهذا سجل أولاد النبي إسحاق: إبراهيم خلا إسحاق، ²⁰وكان النبي إسحاق عندو 40 سنة فالوقت اللي اتعرس فيه امع رفقة منت بتوئيل لأرامي

اللي جاي من واد آرام، وكانت خت لابان لأرامي.²¹ وكانت رفقة اعيال النبي إسحاق عاكر. وپام النبي إسحاق واطبلها الله تعالى اياك تجبر الذرية. واستجابلو الله تعالى وحملت رفقة.²² وادايكو أولادها وهو ما مزالو فكرشها، وفذا پالت رفقة: اعلاش يخلكلي ذا؟ وامشات رفقة اتصلي واتسول الله تعالى عن السبب.²³ وپالها الله تعالى:

فكرشك أمتين ويتفاركو من هادو لأمتين شعبين ، واحد منهم يقلب لوخر ، وولك لكبير يستعبدو الصغير.

²⁴ وإلین الحك وقت بريها ابرات رفقة اعلى اتواما.²⁵ واخلك لأول احمر واملان من ازغب. وسماوه عيسو اللي معناه لمزغب.²⁶ وعاكب اشواي اخلك خوه، وهو كارد اكراع عيسو. وسماوه يعقوب اللي معناه لمخادع . ووقت اخلاكتهم كان النبي إسحاق عندو 60 سنة.

²⁷ وكبرو التركة وكان عيسو اخباري فالصيد ويبيغي الخلوات. ويعقوب كان عكسو بارد ويبيغي لكعاد فالخيام.²⁸ وكان عيسو هو لمفضل عند النبي إسحاق بيهلي يجبلو من صيدو. وكانت رفقة غالي اعليها يعقوب.

²⁹ وفيوم من لأيام يلين ارجع عيسو من الخلوات فتران، اجبر يعقوب انصب اطعام زين.³⁰ وپال عيسو ليعقوب: غديني من ذا الطعام لحر. أنا ميت بيّ الجوع. ولهذا السبب عيسو أسماً أدوم اللي معناها لحر كيف الطعام اللي كال .³¹ وپال يعقوب لعيسو: لاهي انغديك بشرط اعلنك اتبعيلي بكوريتك .³² وپال عيسو ليعقوب: اعلى ذي الحالة أنا لاهي نعكب انموت بالتالي شنهى الفائدة من بكوريتي؟³³ وپالو يعقوب: احلفلي ظرك . واحلفلو عيسو وبهاذي الطريقة باع عيسو بكوريتو ليعقوب.³⁴ واعطا يعقوب لعيسو شي من امبورو ولعدس وكال عيسو واشرب وپيم ماشي. وبهاذي الطريقة احتقر عيسو فائدة لبكورية.